

PETERU ME NIINÄCE LETA

¹ Cane Peteru säne; Yeesu Keriso me ätyepäneji biname gäne. Cane weeme bau me yoogärenine lui gemi Acejiyame me jäjäcräneji biname, weene lui cina tuucratnininujiye ai maramara probins cabu lenajame: naace Pontus me, Galatiya me, Kapadokiya me, Asiya me, cuta piiyepu Bituniya me. ² Ujarage, Aceji Babe te weebibine itu jjäcrininiuji teeme biname me äbitame. Aceji Seemo peei kaakesea weeme yepäyepä trupa cabu ituge wawena, weene Yeesu Keriso me mene äcwetname piiyepu teeme uudi ca kälyä pääpäname, ingle tabe budre äbituji, siige teeme uudi te tapiruji weeme niiya mule äcisejame.

Acejiyame me miiji te weeme cabu lenajame piiyepu tabe weebibine baborage poode ceerame.

Toraca Ireclota Cabucewe je Pisi Nyene Mime tääpume

³ Mine Acejiyame ne eso pa yääcäresi, lui mime Yageyame Yeesu Keriso me Babe piiyepu Acejiyame gyene. Tabe baborage owecu gyene mime tääpume, mibibine kirece ireclota itu nicärininiuji, tabe liba Yeesu Keriso ne budre cabu ca erpinantuji. Yeesu me arpinenta cabu ca mine umle gemi egä tabe cuta mibibine cirege arpinera ten cama iyeteta lenajame. ⁴ Mine cuta umle egä miijimiji gwidape piti nemi cabucewe je mime tääpume, ingle mine Acejiyame me bägräwale gemi. Peei gwidape lica gawecewe gwidape pana gemi, yepä ngälu cäco gemi, piiyepu ocwäwa cäco, piiyepu

peei cina äblicäco sabe me äbita. ⁵ Acejiyame me kokre pisi nyene mibibine cängena waadename pee toraca ireclota cabu me iyeteta ten cama lenajame, ingle mine teebine jäätprungusi. Mime puupu pisi nyene cabucewe je amacetnäjäneji, piyepu pee äsecrera puupu ne cirege aboclomta ceräcerägääbu padare cabu.

⁶ Peei name pi mine ngenecu gege cama ninajininige, ingle mine toraca gege puma cirege lenaja. Ngänu gyene mine page puu ngenecu mäpu cama matikolä padare ninajininige, ingle maramara apicetnera cina mime bau me scelenige. ⁷ Mine naace popi pee apicetnera bine jääpänemusi egä pee cina mime Acejiyame cabu ätrunga ne toraca kokre me wawename. Yoo, mime ätrunga me apicetnera bine mine ngene ca eglemisi kula pana gwidape cabu ca, ngii gol. Nuuja taje biname cina gol kula bine baborage nuunu jaawenemusi daglamete äyeblengame. Piba miijurage gol taatu tasatuge muye cabu ca. Ngänu gyene puu gol me lenaja lica iyeteta gyene, yepä muye ca miijurage jaawenemusi, piba cuta mime ätrunga bine lui baborage gemi gol cabu ca, miji apicetnera kokre lenajame. Piba ceräcerägääbu bimu cabu Yeesu Keriso teemämu liba cire laboclomtepi, baborage miji pisi nyene mime tääpume lui cina pepu ätrunga cama gemi. Acejiyame bau ca mine piba awepyeräja, jamyacu apaclyera, piyepu miijurage ngii cire jääpänemepesi. ⁸ Mine puu Acejiyame ne lica ituge päpäna, yepä mime baborage singi pisi nyene teeme tääpume; cuta page mine puu äblicäco teebine päpäna, yepä mine teebine cängena jäätprungusi. Peei name pi mime

ngenecu gege epu baborage gyene, siige mine peei poto cidi me mene äblicäco. ⁹ Peei gege eei name pi gyene, Acejiyame mibibine niiya cabu ca nisecräremininige, niwadininige cabucewe me ten cama iyeteta lenajame. Peese nyene ingle mine teebine ätrungame.

¹⁰ Mime äsecrera niiya cabu ca iyeteta ireclota cabu me, Acejiyame me sasa mename biname cina baborage singi peei poto cidi me umle äbitame. Teepi biname bine ingwerage padare täüpume mene jejemujisi Acejiyame me owecu piyyepu ätityera mule poto cidi me mime täüpume, yepä teepi umle äbitame liga läbitininusi, pajecu lica ge teeme täüpume. ¹¹ Keriso me Seemo teebibine mene jejananemuji egä, “Ciige Acejiyame me jajeji biname Keriso te mage mäpu padare ne cire jäätänepi, peei cabu ca cire lasatepi, siige jamyacu apacyera ne cire jäätänepi.” Teepi peei mene poto cidi me mage ngene jotwanininujisi, ingle teepi babo singi ge umle äbitame egä lipulipu piyyepu lui padare cabu peei mule te cirege äbita. ¹² Acejiyame piba teebibine umle jewenanemuji egä pui mule te licarage teeme ireclota padare cabu cirege äbita, yepä ingwerage padare mime ireclota cabu mime täüpume. Yoo, page Miji Mene pajecurage jajanäneji gyene iyeta mime cabu me. Lui biname cina ai mene weebibine ituge jajanena, teepi cabucewe ca Aceji Seemo bau ca teeme umle itu jepänujisi. Peei mule pepu mijirage gyene egä Acejiyame me mename seemo cina cuta singi gemi cerämu umle äbitame peei täüpume.

Weene Cägenarage Conocäco Inajipi!

13 Yoo, mine Acejiyame me miji mule poto cidi me umle gemi, peei name pi mine ngene atwanena bine pa yaamacetnäjempesi, cängenarage lenajame. Mime ngene atwanena bine pa yaacranemepesi Acejiyame me owecu piiyepu miji cabu me, mine lui bine teeme bau ca cirege päpäna Yeesu Keriso me acnenuta bimu cabu. **14** Page mine Acejiyame me bägrä gemi, peei name pi mine teeme singi pa jaawenepesi. Gonerage weeme sasa singi bine waadena, epu pana pui padare cabu lipu yaawadimuye, weene toraca gaabe poto cidi me liba umle cäco inajininuji. **15** Acejiyame lui te mibibine ituge jäjacra, tabe conocäcorage gyene, peei name pi cuta mine miji conocäco mule taatu jaawenemepesi. **16** Yoo, Oogäräneji Mene te apu jiicenige egä, “Weene cängena epucäco inajipi, ingle cane epucäco gäne.”

17 Acejiyame te iyeta biname bine yepä ibi cirege atrana teeme waweneca poto cidi me, nuuja te lica cirege asata atrana cabu ca. Peei name pi mine lui cina teebine yaainusi Babe ca, mine miji cuta teebine cängenarage opo gaabe me acita iyeta mime lenaja cabu ai gawecewe cabu je. **18** Acejiyame weebibine ituge äsecrera weeme kaakesaarewale bime krokeciyiye mule cabu ca. Mine umle gemi egä tabe lica rarekaake ecäruji mime äsecrera täüpume. Rarekaake me daremu lui nuuja taje gawe me läbituge. **19** Yepä, tabe teeme ngenecurage bägrä Keriso ne ecäruji. Keriso budre äbituji, teeme uudi tapiruji mibibine äsecrerame. Yoo, Israela biname bime sasa mule cabu teepi mijiirage maamoi plongo ca yiwärusi

teeme niiya mule bine äyeblengame. Peei plongo lui jamyacurage yaanajuge, teeme nuuja dupe lica birige. Yoo, Keriso pepu maamoi pana conocäo gyene. Tabe teemämu itu iiwäräjuji mime niiya mule äyeblengame. ²⁰ Acejiyame camuge ai gawecewe ne wawena tabe liba Keriso ne jejuji mime niiya cabu ca äsecrera biname me äbitame, siige ai padare cabu teebine ituge aboclomta mime täüpume. ²¹ Yoo, Keriso me miiji kaakesea name pi mime ngene atwanena cina Acejiyame cabu yaacrajuge. Tabe te teebine budre cabu ca erpinantiji, piba cabucewe me ecanuji jamyacu apaclyera cabu lenajame. Peei name pi mine Acejiyame ne jäätru-ngusi piiyepu mime ngene atwana teeme cabu yaacranusi.

²² Mine Acejiyame me toraca mene ne ituge ätecija mime trupa bine amacetnäjame, ngälu siige page mine toraca singi me ituge äbita mime ätrunga binamewale bime täüpume. Yoo, mine mime biname bime täüpume baborage singi pa läbitipago iyeta mime ngenecu cama. ²³ Page mime kirece ireclota pisi nyene. Peei ireclota lica ge mime mage babe bime cabu ca, ingle teeme bau ca ireclota lui ngälu cama gyene. Yoo, Acejiyame lui ngälu cäco gyene; tabe te ai kirece ngälu cäco ireclota mibibine itu nicärininuji pui padare cabu mine liba teeme mene jitrungujisi, ingle teeme iyeteta mene cabu kokre pisi nyene iyeteta ireclota ceerame. ²⁴ Oogäräneji mene te ai poto cidi me jiicenige egä,

“Iyeta biname bime ireclota lui baace pana gemi;
iyeta teeme miiji lui epu pana gyene baace
popo me liiyepu.

Yoo, baace te budre läbituge,
 cuta teeme popo cina saatrametnemuge,
²⁵ yepä Yageyame me mene lui iyeteta ngälu cäco
 gyene.”
 Yoo, peeii Miji Mene ituge weebibine jajanena.

2

Mine Äjäcräneji Gemi Acejiyame bau ca

¹ Yoo, Acejiyame mibibine kirece ireclota nicärininuji, peeii name pi mine miji iyeta niiya mule bine abmala. Walya mene iicana gone, piiyepu walya mule gone wawena, äcneca gone, cuta piiyepu gone nuuja biname me gwidape ire patre agli. ²Epu pana matimati bägrä liiyepu iyeta padare singi ngame migi nänäjame, weene miji Acejiyame me mene tääpume pepu pana baborage singi äbitame, naace tääpume weeme ätrunga te uutaname ngälu weene iyeteta ireclota ne päpäname. ³Yoo, mine ituge päpäna egä Yageyame lui mjjirage, owecu cama biname gyene.

⁴ Mine Yageyame bau me pa naclege, ingle mime ireclota teeme cabu ca gyene. Tabé epu pana gyene kula caage liiyepu, poto biname cina lui ne jäägyusi egä raranga tääpume miji lica gyene, yepä Acejiyame te lui ne jejuji egä babo mjjirage teeme tääpume. ⁵ Tabé lui bine iyeteta ireclota nicärininige, mine lui mete kula pana gemi teeme tääpume. Epu pana mete raranga biname te liiyepu kula bine yaawademuge teeme kula mete rarangame, Acejiyame mibibine niwadininige teeme ätrunga ingle bine wawename.

Acejiyame singi gyene mine teeme kirece mulleyame iiwäreja biname me äbitame teeme singi mule Yeesu Keriso me ätityera cabu ca wawename.

6 Oogäräneji Mene pisi nyene pui kula poto cidi me, lui Keriso sine, egä,

“Ire, cane babo muijirage kula jitränutenine,
sipe caage täüpume jecnenine Yerusalem
cewe cabu Siiyona podo cabu je.

Lui cina teebine jäätprungusi,
teepi lica birige ajiri me äbita, yepä miji
lenaja ne jääpänsi.”

7 Siige, Keriso lui babo muijirage gyene mime täüpume lui cina teebine jäätprungusi. Yepä, lui cina singi lica teebine ätrungame, teepi cuta umle cirege tabe lipu baborage gyene! Oogäräneji Mene te pee i poto cidi me jiicenige egä,

“Lui kula ne raranga biname cina jigyisi,
baborage bääbitige iyeta nuuja cabu ca.”

8 Oogäräneji Mene nuuja gome cuta jiicenige egä,
“Ai kula te jaawenemuge biname bine naabe at-
ropengäja,
eei kula lui te teebibine jaawenemuge
atrametname.”

Yoo, teepi naace name pi yaatrametnemuge, ingle teepi lica Acejiyame me mene jäätprungusi pee i kula poto cidi me, lui Keriso sine. Pepu ge Acejiyame me singi teeme täüpume.

9 Yepä, mine teeme pana lica gemi, mine Acejiyame me jääcräneji biname gemi, lui miji kaakesea biname gemi mime Mope Biname Keriso täüpume irecu ätumuta kaakesea wawename. Mine mara tomi cabu temi nuuja biname cabu ca, ingle mine Acejiyame täüpume mara me

ituge äbita. Mine Acejiyame me inglewale gemi, mine jäjäcräneji gemi mene jajanename iyeta teeme miijimiji mule poto cidi me. Toraca, teeme mule mime täüpume babo miijirage gyene. Tabe mibibine krokeciye cabu ca ala nisoglicipi teeme miijirage apaclyera cabu lenajame. ¹⁰ Niinäce mine Acejiyame me ingle cabu lica ge, yepä page mine pui cabu temi. Niinäce mine nuuja umle lica ge Acejiyame me owecu poto cidi me, yepä page mine teeme owecu ne ituge päpäna.

*Acejiyame me Kaakesea Mine Jaawenusi Toraca
Ngenecu cama*

¹¹ Cäme binamewale, mine catecewe biname pana gemi ai gawecewe cabu. Peei name pi mine miiji mime tääpe me niiya singi bine ägyema, ingle peei cina mime toraca singi ne Acejiyame täüpume sabe jaawenusi. ¹² Mine miiji iyeta padare cabu epu cängena lenajame teeme gome lui cina Acejiyame umle cäco gemi, egä teepi liba apu jaangemuge egä, “Teeme mule mara gyene peei name pi conocono,” pui biname cina mime miiji taatu waweneca pa jäätäpäneperi. Teepi piba Acejiyame ne cire yaawepyeräjepesi teeme acnenuta bimu cabu.

¹³ Yageyame me singi name pi, iyeta ai gawecewe mope biname bime cotre mine miiji jaawenemusi, egä miiji mime gawecewe babo mopeyame me mene cängena ätecijame. ¹⁴ Cuta piiyepu teeme ingwe gaabe ca mope biname bime mene mine miiji ätecija, ingle babo mope biname te teebibine jäätäyepäjemu niiya mule biname bine

teeme daremu ceerame piiyepu miji mule biname bine awepyeräjame. ¹⁵ Acejiyame singi gyene mine cängena lenajame naace täüpume pui biname lui cina buduma gemi Acejiyame me mule poto cidi me, teepi mime miji taatu ireclota ne liba jäätäpäni, piba teepi iicetneja mene äblicäo. ¹⁶ Yoo, mime toraca Mopeyame lui cabucewe je yaanajuge, piiyepu mine äsecräreji gemi ai gawecewe mule cabu ca. Yepä, mine äblicäo apu angi egä, "Cane asatäneji gäne gawecewe biname bime cotre cabu ca, siige miji gäne ai niiya mule wawename." Eewe, pepu gone! Mine miji iyeta mime ireclota cabu ca abocломäja egä mine Acejiyame me biname gemi teeme singi bine wawenecame. ¹⁷ Mine iyeta biname bine cängena opo gaabe me yaacranemusi, iyeta ätrunga biname bine owecu jaawenemusi, mime gawecewe mopeyame me mene cängena jäätäcijusi, piiyepu lui mule täüpume Acejiyame singi lica gyene, mine miji wälü peeine wawename.

Keriso pana Mule Mine Miji Jaawenemepesi

¹⁸ Weeme poto lui cina nuuja biname bime kaakesea jaawenemusi, teepi miji teeme babo biname me mene cängenarage ätecija; lica eei taatu me lui owecu cama teeme kaakesea bägrä bine ire jaatwemuge, yepä cuta owecu cäco babo biname me mene miji ätecija. ¹⁹ Yoo, miji gyene weeme nuuja täüpume tabe liba poode ngene atwanena cama mäpu cabu cewe loocananuge, liba peein mäpu lica toraca daremu teeme niiya mule täüpume, piiyepu tabe liba ngene jwaatwananuge

apu egä, “Acejiyame singi gyene cane apu lenajame liba mäpu cabu.” ²⁰ Siige, ngena miiji gyene weeme täüpume, weene liba cmecme ne bojäcu jäätäpänuwee niiya wawena täüpume? Yepä, weene liba miiji mule taatu jaawenemuye, puma cita ca cewe oocana bojäcu jäätäpänuwee, piba Acejiyame weebibine miiji pa jiwenipi. ²¹ Yoo, peei täüpume Acejiyame te mibibine ituge ala asogleca, ingle Keriso mäpu cabu itu cewe oocananuji mime niiya mule äyeblengame. Tabé mibibine niwabininuji lipulipu teebine ingwe äcwime. ²² Teeme nuuja niiya mule lica ge, piiyepu nuuja walya mene teeme tage cabu ca lica ituge asata. ²³ Teepi liba teebine jäätäcnečus, tabé lica teeme mene jewecnistemusu. Teepi liba teebine niiya me jaawenusi, tabé lica jaajemuge egä, “Cane ai ne pa yaawecnistepene.” Eewe, tabé iyeta teeme ngene atwanena Acejiyame me ime cabu icranemuji, lui te biname bine conocäco jaatranemuge. ²⁴ Keriso mime niiya mule bine teeme tääpe cabu ewademuji baarge uli cabu me, naace täüpume mine iyeta niiya mule abmalame, piiyepu conocäco mule cina mime ireclota cabu lenajame. Tabé dupe bine jepänemuji mibibine miiji me wawename. ²⁵ Yoo, mine lui epu pana gemi maamoi liiyepu, lui te gaabe cabu ca lapesaruge, yepä Acejiyame mibibine gaabe cabu me cuta niwecnininuji mime seemo me Ire Atwiyame piiyepu Yageyame ne ingwe äcwime.

3

Ai Mene Lui Coga Rooriye täüpume

1 Cuta agesa käme mene magebi tääpume. Weeme rooriye bine yäätecijemuye piiyepu teeme singi weene cängena jaawenemuye. Yoo, poto weeme rooriye liba Acejiyame me mene lica jäätprungusi, teepi weeme miijimiji mule liba jääpänemusi, puma cita ca Acejiyame tääpume cuta singi läbitininusi. **2** Mene ngänu gyene, ingle teepi pa jääpänepesi weeme jugi käco mule bine, piiyepu weene teebibine lipu opo gaabe me yaacranemusi. **3** Yoo, weene liba singi gemi jamyacurage lenajame, edingäli amacetnäjame, miijimiji käbletääpe piiyepu oplacmeläja gwidape asigrerame peei lui babo gwidape lica gyene. **4** Pätä, weeme ngenecu bine yaamacetnäjemuye ngenecu bojäcu piiyepu owelaamelame lenajame. Pepu jamyacu te sasa me lica läbituge. Peei lui baborage gwidape gyene Acejiyame me opo gaabe je. **5** Sasa cabu ca magebi lui cina Acejiyame tääpume mara me läbitininusi piiyepu Acejiyame cabu teeme ngene atwanena bine yaacranemusi, teepi ngenecu cabu ca jamyacu ge, piiyepu teeme rooriye me singi cängena sewademujisi. **6** Saara pepu magebi ge. Tabé Abrahamo me mene jäätcejuge piiyepu teebine yageyame ca yaainuge. Weene miji gemi Saara ne ingwe äcwime, weene liba conocäco mule jaawenemuye piiyepu lica wälu ne padare ceera weeme jamyacu ngenecu ne sabe wawename.

7 Age käme mene rooriye tääpume. Weeme coga bime kokre lica gyene weeme pana baborage, peei name pi teebibine owecu cama opo gaabe me yaacranemuye. Weene umle gemi egä weene iyeteta ireclota ne ten cama cirege päpäna Ace-

jiyame me owecu name pi. Weene pepu cängena inajininuge naace tääpume nuuja gwidape te lica weeme irecu ätumuta mene bine iibecla.

Lipu Mule Gyene Miji Biname Liba Mäpu cabu Yaanajuge

⁸ Age cäme mene weeme iyeta tääpume. Weene yepä ngene atwanena cama inajipi, weemämu owecu piiyepu singi läbitininuye, ingle mine iyeta Acejiyame me inglewale gemi. Peei name pi weeme nuuja bine owecu cama yäättityäremuye, piiyepu niinäce gaabe me jaawenemuye. ⁹ Yoo, nuuja biname te liba weeme yepä ne niiya jaawenuge, gone teeme daremu ne awecnista. Nuuja te liba niiya mene teebine jaajuge, gone niiya mene ne jaawecnis-tute, päätä weene Acejiyame bau irecu lätumutinuye pui me miji tääpume, ingle Acejiyame weebibine ituge ala asogleca pepu lenajame teeme bau ca miji päpäname. ¹⁰ Oogäräneji Mene te jiicenige egä,

“Lui te singi gyene gege

piiypu mijiirage ireclota tääpume,
tabe miji teeme wätä ne cängena ire jaatwuge
niiya mene iicema cabu ca,
piiypu walya mene te gone teeme tage cabu ca
asata.

¹¹ Tabi miji niiya mule cabu ca latatrongäruge
miji taatu mule wawename.

Tabi miji poode tääpume singi piiyepu pee
cabu lenajame.

¹² Ingle mime Yageyame te conocäco mule biname
bine cängena ire jaatwemuge,
piiypu teeme irecu ätumuta mene
cängenarage yäätecijuge.

Yepä, biname lui cina niiya mule jaawenemusi,
tabe teebibine kaake ca yääcelyäremuge.”¹³

¹³ Siige, pama nuuja te lica weebibine niiya pa jiwenipi, weene liba singi gemi miji mule taatu wawename. ¹⁴ Yepä, liba biname te weebibine niiya pa jiwenipi weeme miji mule name pi, weene miji taatu peei cabu ca pagege päpäna. Wälu gone biname täüpume, cuta piiyepu mäpu ngene atwanena gone yaacatuye. ¹⁵ Yepä, weene miji Keriso ne niinäce puupu ecärepeye weeme ngenecu cabu, piiyepu teebine Yageyame me jaawenepeye weeme täüpume. Yoo, biname te liba weeme yepä ne yäätemluge aboclom-tame tabe ngene ne ngene atwana ca joomluge, tabe miji amacetnäjäneji lenajame mjjirage daremu mene awecnistame. ¹⁶ Weene owecu cama weeme ätrunga ne cängena eboclomteye nuuja biname bime täüpume. Weene cängena inajininuge, piba weeme ngenecu te lica mäpu läbituge niiya mule name pi, yepä weeme mule ne weene ngene ca yaagluye egä miji taatu gyene. Piba biname lui cina niiya mene jijcemusi weeme Keriso cabu miji mule poto cidi me, teepi ajiri me pa läbitipesi teeme mene poto cidi me. ¹⁷ Yoo, weene liba mäpu jäätäpänuweeme niiya mule name pi, peei weeme yene ingle. Yepä, weene liba mäpu jäätäpänuweeme miji mule name pi, peei liba Acejiyame me singi birige, piba peei cabu pisi nyene miji weeme täüpume. ¹⁸ Yoo, Keriso cuta mäpu jepänuji, tabe liba budre äbituji weeme niiya mule äyeblengame. Tabi lui conocäco biname ge, tabe yepä gääbu budre äbituji, iyeta conocono biname bime niiya mule daremu ne peega ecatuji, gaabe mime

tääpume jewenuji Acejiyame bau otnime. Tabe binamerage tääpe cama budre, yepä cabucewe tääpe cama arpinantuji. ¹⁹ Tabe piba gawecewe ne ebmaluji, piiyeme äduji Miji Mene jajime pui sasa budre biname bime seemo bine, lui cina awamuta puupu cabu yaacrajuge atrana trämä. ²⁰ Peei lui eei bime seemo gemi, lui cina ujarage Nooa me padare cabu singi lica Acejiyame me mene ätecijame. Yoo, Acejiyame leca padare teebibine jewagrijemuji teeme mene ätecijame, Nooa liba pui poo ne eranguji. Yepä, eit biname taatu cina teeme mene jitecijujisi, pui poo bora me ebäcnujisi, pepu äsecräruji babo igi niiye cabu ca. ²¹ Yoo, mime niiye ca äciseja Yeesu me ngii cabu lui seeji pepu pana gyene. Mine niiye ca äciseja ne ituge acata Yeesu me ngii cabu niiya mule daremu cabu ca äsecrerame, ingle mine Yeesu Keriso ne jitprungujisi lui te budre cabu ca itu arpinantuji. Peei äciseja tääpe jugi ne lica birige äyeblingta, yepä peei ca mine Acejiyame bau me latatrongärinago, teebine yaawejanusi mime ngenecu amacetnäja tääpume. ²² Yeesu Keriso ituge otni cabu me; tabe puma cabucewe je Acejiyame me camu poto cidi me enajenige. Tabe iyeta mename seemo bine ire jetwenenemige piiyepu iyeta nuuja kokre gwidape piiyepu maramara mopeyame bine.

4

Acejiyame tääpume Inajipi

¹ Naace name pi Keriso cewe oocananuji teeme ai gawecewe tääpe cabu, mine miji teeme pana ngenecu kokre äbita, ingle lui te teeme tääpe cabu

cewe loocanuge, teeme tääpume siige gyene niiya mule me kokre. ² Peei name pi ai gawecewe lenaja cabu weeme niiya singisingi mule gone jaawenemuye, yepä Acejiyame me singi taatu jaawenuye. ³ Uja baborage padare cabu weene epu biname bime niiya singisingi mule bine jenenemujiye lui cina lica Acejiyame ne jäätprungusi. Naace ge weeme poto bime ireclota cabu peega ge jugijugi mule piiyepu singisingi niiya mule tääpume. Nesae padare lica ge weene liba umle ge sice buduma äbita, piba buduma piiyepu niyyarage mule bine jaawenemuye. Weene uuje bine ituge ätrunga piiyepu teeme tääpume gogecupi itu jaawenemepeye. ⁴ Yoo, page weeme ceegewale călu te jitenenemige, weene liba singi lica gemi ten cama abasutame pui mule cerämu wawename. Teipi peeи name pi weebibine jisädininus. ⁵ Peei ngänu gyene, teipi Acejiyame me opo gaabe cire laitnipesi iyeta peeи mule tääpume. Tabе amacetnäjäneji gyene iyeta biname bine atraname, teebibine lui cina ireclota gemi piiyepu lui cina ituge budre äbita. ⁶ Yoo, ngena tääpume pui toraca mene Keriso poto cidi me ituge jaji sasa budre biname bime seemo bine? Agesa ingle: Teipi ituge budre päpäna, ingle budre lui Acejiyame me daremu gyene iyeta biname bime niiya mule tääpume. Yoo, teeme tääpe ituge budre, yepä Acejiyame te singi ge pui seemo bine cuta padare ceera Miji Mene ätecijame teipi piba teeme pana ireclota cabu lenajame.

*Acejiyame te Mibibine Miijimiji Kaakesea
Nicärininuge*

7 Ai gawecewe me ngälugaabe cudecewe lica gyene. Peei name pi weemämu cängena bojäcu ire latwinuye, weeme ngene atwa-nena bine amacetnäjäneji irecu ätumuta tääpume. **8** Ai lui baborage gwidape gyene egä weene miji weemeweme singi lenaja, ingle singi liba pisi nyene, weene miji gemi biname bime bucurage conocono mule bine ngene ätrimelame. **9** Weemeweme awabläjipeye mete cabu äsinglentame, piiyepu mogobi wee-meweme awenäjipeye gege cama. **10** Yoo, Acejiyame iyeta mibibine maramara kaakesea ituge ceera. Mine peei kaakesea cängena jaawenemusi mime yepäyepä bine ätityerame. **11** Acejiyame bäärmii kaakesea lui ne yääcäruge, miji tabe Acejiyame me mene ne cängena yaaboclomtuge. Acejiyame ätityera kaakesea lui ne yääcäruge, tabe miji Acejiyame me kokre cama nuuja biname bine ätityerame, naace tääpume iyeta mime kaakesea cabu Acejiyame me ngii awepäntoji lenajame. Piba pajecu gyene egä mine Yeesu Keriso me biname gemi. Yoo, jamyacu apaclyera piiyepu kokre lui teeme yene iyeteta ngälu cäco. Eso.

Mäpu cabu Cängena Lenaja

12 Cäme ngenecurage binamewale, mäpu apicetnära liba mime bau täduge, cälu te äti gone, piiyepu ngenecu niiya gone läbitininago. Pepu mäpu lui mime bau taatu lica gemi. **13** Peei name pi mine ngenecu gege äbitininago, ingle mime mäpu lui epu pana gemi Keriso lipu mäpu bine jepänemuji. Ceräcerägääbu bimu te liba cire tädepi, piiyepu iyeta biname cina Keriso me

jamyacu apaclyera ne liba cire jäätänepesi, mine piba baborage gege cama cire ninajipi. ¹⁴ Yoo, mine liba äcneca nitecijinuge, ingle mine Keriso me binamewale gemi, mine ngenecu gege pa läbitipago, ingle naace popi Acejiyame me Seemo piba mime trupa cabu jamyacu apaclyera cama yaanajuge. ¹⁵ Miiji lica gyene egä mine mäpu bine jäätänenemusi ingle naace name pi mine biname ne budre me yaaglusi, gwidape ne ero ca yaacatusi, coo nuuja niiya mule bine jaawenemusi, coo piiyepu nuuja biname bime kaakesea jääsädus. Pepu mule cabu ca mäpu liba jäätänenusi, yoo mime ingle gyene. ¹⁶ Yepä, mine liba mäpu jäätänenusi ingle mine Keriso me biname gemi, piba ajiri gone, yepä Acejiyame ne baborage eso yääärusi egä mine Keriso me ngii cama gemi.

¹⁷ Acejiyame me atrana padare mameta gyene. Tabo teeme biname bine niinäce gaabe pa jaa-tranemepi. Yoo, tabo liba teeme atrana kaakesea ne gije pa labacitepi mime bau, piba mage mäpu teeme tääpume lui cina Acejiyame me mene lica jäätäprungusi, ¹⁸ Oogäräneji Mene te jiicenige egä, “Miiji mule biname cina mäpu bine pa jäätänenemepesi,

piba pa läsecrärepı Acejiyame cama lenajame. Yoo, piba lipu gyene teeme tääpume,

lui cina Acejiyame me biname lica gemi,
piiyepu niiya mule bine jäje jaawenemusi?”

¹⁹ Peei name pi mine lui cina mäpu jäätänenusi ingle peei lui Acejiyame me singi gyene mime tääpume, mine miiji mule ne gone yaabmalusi. Yepä, mimämu Acejiyame me ime cabu lacrani-nago mime miiji tääpume. Tabo lui te iyeta biname

bine itu jwenemuji, tabe lica mibibine ätityera
cäco pa nibmalipi.

5

Acejiyame me Ätrunga Biname Lui Yepä Ingle Biname Gemi

¹ Cäme mene pisi nyene ätrunga ingle bime mope biname tääpume. Cane cuta piiyepu mope biname gäne. Yoo, cane Keriso ne itu jepänujine teeme cewe oocana cabu, piiyepu tabe teeme jamyacu apaclyera ne liba cire saaboclomtepi, cane cuta peeи cabu cire nanajepi. Yoo, agesa käme mene weeme tääpume. ² Weene biname bine cängenarage ewademusi, Acejiyame lui weeme waadena tääpume itu icäripi. Teepi epu pana gemi maamoi liiyepu, piiyepu weene epu pana gemi teeme ire atwi biname liiyepu. Weene weeme kaakesea cängena jaawenemuye, lica epu pana egä biname te weebibine giri jicraninidue, yepä ngenecu gege cama jaawenemuye, ingle Acejiyame pepu mule tääpu myene singi. Gone rarekaake singi name pi ai kaakesea ne wawena, yepä toraca ngenecu cama jaawenuye, ingle weene singi gemi Acejiyame me ätrunga biname bine ätityerame. ³ Weene babo me gone läbitininuye weeme bucourage mene ca. Weene miji umle gemi egä biname lui maamoi pana gemi, teepi teeme ire atwi biname bine ingwe pa yääcwemepesi. Peeи name pi weene cängenarage inajipi, piba weeme ireclota miji gyene nuuja biname cina ingwe äcwime. ⁴ Piba mime Ire Atwi

Mopeyame Keriso liba cire tacnenutepi, mine mijirage daremu ne cire jäätänepesi. Mine teeme jamyacu apaclyera cabu cirege lenaja iyeteta.

⁵ Yoo, mamye biname, agesa mene weeme tääpume, weeme mope biname bime mene yaacatuye. Weene iyeta weeme nuuja bine yäätitäremuye, teebibine niinäce me jaawenemuye, ingle Oogäräneji Mene te apu jiicenige egä, “Lui biname te liba singi teemämu babo äbitame, Acejiyame teebine jäätägyuge, yepä lui biname te Acejiyame ne opo gaabe me yaacituge, Acejiyame teebine miji jaawenuge.” ⁶ Yoo, mine miji matikolä me äbita Acejiyame me opo gaabe, tabe piba mibibine cabu me wawena pagege, teeme mijiirage padare cabu. ⁷ Iyeta mime ngenecu mäpu miji Acejiyame ne yääcärusi; tabe babo owecu cama mibibine nitityärinuge.

⁸ Yoo, weene ire cama cängena inajininuge! Weeme cubuyame Satani tabe drowä glunubora gwidape pana gyene, layani pana waatnetnäjuge. Taber jäärngemuge biname bine sabe wawename. ⁹ Weene Acejiyame ne jäätätrunguye, teeme kokre cama imye-mutinuge, Satani me singi ne yääyecräjuye, ingle weene umle gemi egä weeme ätrunga binamewale iyeta gawecewe cabu teepi yepä pana mäpu bine jäätänanemusi. ¹⁰ Mine liba mäpu cabu matikolä padare ninajininuge, Acejiyame lui te iyeta owecu piiyepu ätityera cama gyene, tabe te mibibine pee cabu ca pa nisecräripi, kokre piiyepu apineca cäco me niwenipi, piiyepu mime ngene atwana Keriso cabu yaacrane-mepi. Taber mibibine ituge asogleca teeme jamyacu apaclyera cabu Keriso cama cirege lenajame.

11 Teeme yene kokre iyeteta ngälu cäco. Eso.

Peteru me Sebore Mene

12 Yoo, Siila te cebine nätyärenige ai matikolä mene oogärame. Tabé cäme tääpume Acejiyame me miijirage ätrunga biname gyene. Cane singi gäne egä ai mene cabu ca weene ätityera ne pa jepänepeye Acejiyame ne cängenarage ätrungame. Ai mene cabu cane weebibine umle jiwenininine Acejiyame me toraca owecu piiyepu ätityera mule poto cidi me. Peei cabu weene cängena imyemutipi!

13 Lui cina ama Rooma babo cewe cabu labase-cretnuge Acejiyame bau irecu ätumutame, teepi weebibine sebore jiwenininisi. Teepi weeme pana Acejiyame bau ca jäjäcräneji gemi teeme biname me äbitame. Cäme bägrä Mareko cuta piiyepu weebibine sebore jiwenininige. **14** Weene weemeweme ajecletnäjipeye sebore mene cama, ätrunga biname bime singi mule liiyepu.

Poode weeme iyeta bime cabu lenajame lui Keriso me biname gemi.

Cane ngii Peteru; cäme mene ngälu peese.

**Ireclota Mene
The New Testament in the Bine Language of Papua
New Guinea
Nupela Testamen long tokples Bine long Niugini**

Copyright © 1993 Bible Society of Papua New Guinea

Language: Bine

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

PDF generated using Haiola and XeLaTeX on 11 Nov 2022 from source files
dated 9 Oct 2020

0b7e6c06-9d83-54ea-bc99-bd2fbdf2dfe4